

氏族典第四百五卷

呂姓部彙考

史記 補三皇本紀

炎帝神農氏其後其州甫甘許戲露齊紀怡向申呂皆姜姓之後並爲諸侯或分四岳

唐書 宰相世系表

呂氏出自姜姓炎帝裔孫爲諸侯號共工氏有地在弘農之間從孫伯夷佐堯掌禮使徧掌四岳爲諸侯伯號太岳又佐禹治水有功賜氏曰呂封爲呂侯呂者膂也謂能爲股肱心膂也其地蔡州新蔡是也歷夏商世有國土至周穆王呂侯爲司寇宣王世改呂爲甫春秋時爲強國所并其地後爲蔡平侯所居呂侯枝庶子孫當商周之際或爲庶人呂尙字子牙號太公望封於齊十九世孫康公貸爲田和所篡遷於海濱康公七世孫禮秦昭襄王十九年自齊奔秦爲柱國少宰北平侯二子伯昌仲景伯昌生青以令尹從漢高祖封陽信侯諡曰胡唐有隋州刺史仁宗卽其後也康公未失國時呂氏子孫先已散居韓魏齊魯之間其後又徙東平壽張魏有徐州刺史萬年亭侯虔字子路孫

行鈞其後世居河東

梁肅集 外王父贈祕書少監東平呂公神道碑銘

公之先出自姜姓太公之裔也唐虞之際佐治洪水有功以能爲禹股肱心膂命曰有呂氏洎太公
誓蒼雒平商牧桓公責包茅匡周道傳國七百列於春秋漢興以勳戚在侯服者二十人臨泗侯之
孫通封於東平其後國除爲郡著族元魏末有汶陽公思禮者扶翼周文開霸關右歷行臺右丞兵
部尙書時魏分爲西東中夏邇隔遂居於河東今爲蒲人也

鄭樵通志 以國爲氏

呂氏姜姓侯爵炎帝之後也虞夏之際受封爲諸侯或言伯夷佐禹有功封於呂今蔡州新蔡卽其
地也歷夏商不墜至周穆王呂侯入爲司寇或言宣王時改呂爲甫然呂甫聲相近未必改也故又
有甫氏出焉呂望相武王呂姜爲衛莊公妃其時呂國猶存故也呂望封齊之後本國微弱爲宋所
并故宋有呂封人樂懼呂封人華豹又晉有呂氏出於魏氏未知其以字以邑與漢有單父呂公女
爲高帝后封臨泗侯又後魏有比丘氏改爲呂氏

同名異實

呂氏有五姜姓之後以國爲氏又晉有呂氏出於魏氏又有叱丘氏副呂氏叱呂氏並改爲呂

黃學士文集 水西翁呂公墓誌銘

府君諱汲字仲修姓呂氏呂氏於姦爲著姓而非一族人因以其所居地望爲別居永康縣之太平

鄉者號太平呂氏

廖用賢尙友錄 呂姓

呂河東羽音又望出東平

呂姓部列傳一

周 呂甥

按左傳僖公十年平鄭之如秦也言於秦伯曰呂甥卻稱冀芮實爲不從若重問以召之臣出晉君

君納重耳蔑不濟矣

呂錡

按左傳成公十六年六月晉楚遇於鄢陵呂錡夢射月中之退入於泥占之曰姬姓日也異姓月也必楚王也射而中之退入於泥亦必死矣及戰射共王中目王召養由基與之兩矢使射呂錡中項伏殺以一矢復命

呂相

按左傳成公十三年夏四月晉侯使呂相絕秦

注

呂相錡子

秦 呂不韋

按史記呂不韋傳不韋陽翟大賈也家累千金秦昭王以其次子安國君爲太子安國君所甚愛姬曰華陽夫人無子安國君中男子楚質於趙秦數攻趙子楚困不得意呂不韋曰此奇貨可居乃往見子楚說之又西游事安國君及華陽夫人使以子楚爲嗣不韋取邯鄲諸姬絕好善舞者與居知有身乃遂獻其姬生子政秦昭王五十年子楚脫歸昭王薨安國君爲王一年薨子楚代立是爲莊襄王三年薨子政立爲王尊不韋爲相國號稱仲父太后時時竊私通不韋不韋恐禍及己乃私求大陰人嫪毐進之始皇九年有告嫪毐與太后亂於是夷嫪毐三族而遷太后於雍不韋徙蜀乃飲

酖而死

漢 呂公

按史記高祖本紀單父人呂公好相人見高祖狀貌重敬之曰臣少好相人相人多矣無如季相願季自愛臣有息女願爲季箕帚妾呂嫚怒呂公曰公始常欲奇此女與貴人沛令善公求之不與何自妄許與劉季呂公曰此非兒女子所知也卒與劉季呂公女乃呂后也注相經云魏人呂公名文

字叔平

按恩澤侯表漢元年封臨泗侯四年薨

呂青

按漢書功臣侯表青以漢五年用令尹初從功比堂邑侯封陽信侯十年薨諡胡

呂馬童

按漢書功臣侯表馬童以郎騎將漢元年從好時以司馬擊龍且復共斬項籍六年封中水侯三十年薨諡嚴

呂澤

按漢書恩澤侯表澤以客從入漢定三秦將兵下碭漢王敗彭城往從之佐定天下六年封周昌侯三年薨諡令武高后元年追尊曰悼武王

呂釋之

按漢書恩澤侯表釋之以客從擊秦漢王入漢使釋之歸豐衛太上皇六年封建成侯九年薨諡康高后元年追尊曰趙昭王

呂騰

按漢書功臣侯表騰以騎士漢三年從出關以郎中共擊斬項羽七年封涅陽侯二十五年孝文五年薨諡嚴子成實非子不得代

呂嬰

按漢書功臣侯表嬰以連敖從高祖破秦入漢以都尉定諸侯死事

呂臣

按漢書功臣侯表臣以舍人從起留以郎入漢破曹咎成皐爲都尉擊陳豨十一年封甯陵侯二十

七年薨諡夷

呂臣 呂台 呂產 呂則 呂種 呂祿 呂平

按漢書功臣侯表孝惠四年陽信頃侯臣嗣十八年薨 按漢書恩澤侯表周昌侯台嗣高祖九

年更封爲酈侯四年高后元年爲呂王二年薨諡曰肅 按漢書恩澤侯表產台弟高后元年封

汝侯六年爲呂王七年爲梁王八年反誅 按漢書恩澤侯表孝惠二年建成侯則嗣七年有罪

免 按漢書恩澤侯表種則弟高后元年封沛侯七年更爲不其侯八年反誅 按漢書恩澤

侯表祿種弟高后元年封漢陽侯八年爲趙王反誅 按漢書恩澤侯表平以皇太后姊長姁子

高后元年封扶柳侯八年反誅 按平既呂氏所生不當姓呂蓋史家惟記母族也茲姑仍之

呂勝 呂更始 呂忿 呂瑩 呂它 呂嘉 呂通

按漢書恩澤侯表勝以皇太后昆弟子淮陽丞相封贅其侯八年反誅 按漢書恩澤侯表更始

爲舍人郎中十二歲以都尉屯霸上用楚丞相封滕侯八年反誅 按漢書恩澤侯表忿以皇太

后昆弟子封呂成侯八年反誅 按漢書恩澤侯表瑩以皇太后昆弟子封祝茲侯八年反誅

按漢書功臣侯表它以父嬰死事高后四年封俞侯四年坐呂氏誅 按漢書恩澤侯表高后三

年呂王嘉嗣坐驕廢 按漢書恩澤侯表通嘉弟高后六年封腫侯八年爲燕王反誅

呂屯 呂義 呂它 呂瑕 呂謝 呂青眉 呂始 呂善

按漢書恩澤侯表屯通弟高后八年封東平侯反誅 按漢書功臣侯表孝文七年陽信懷侯義

嗣二年薨 按漢書功臣侯表孝文九年陽信惠侯它嗣十九年薨 按漢書功臣侯表孝文

十年中水夷侯瑕嗣三年薨 按漢書功臣侯表孝文十一年甯陵戴侯謝嗣十六年薨 按

漢書功臣侯表孝文十二年中水共侯青眉嗣三十二年薨 按漢書功臣侯表孝景四年甯陵

惠侯始嗣十七年薨 按漢書功臣侯表孝景五年陽信共侯善嗣五年薨

呂談

按漢書功臣侯表孝景中三年陽信侯談嗣三十五年元鼎五年坐酎金免

呂步舒

按漢書董仲舒傳遼東高廟災仲舒在家推說其意主父偃竊奏之上以示諸儒仲舒弟子呂步舒

不知其師書以爲大愚下仲舒吏

按儒林傳步舒至丞相長史

呂德 呂宜城

按漢書功臣侯表建元六年中水靖侯德嗣一年薨

按漢書功臣侯表元光元年中水侯宜城

嗣二十二年元鼎五年坐酎金免

呂嘉

按漢書南粵傳南粵王興立元鼎四年漢使安國少季諭王王太后入朝其丞相呂嘉上書諫止王太后謀誅嘉嘉作亂攻殺太后王盡殺漢使者於是天子令路博德攻敗粵人呂嘉囚入海粵郎都稽得嘉爲臨蔡侯

呂陽 呂建明 呂忠 呂得

按漢書功臣侯表元康四年陽信侯青元孫長陵大夫陽詔復家

按漢書功臣侯表元康四年

中水侯馬童元孫之孫長安公士建明詔復家

按漢書功臣侯表元康四年涅陽侯騰元孫之

子涅陽不更忠詔復家

按漢書功臣侯表元康四年甯陵侯臣元孫南陵公大夫得詔復家

後漢 呂強

按後漢書呂強傳強字漢盛河南成臯人也少以宦者爲小黃門再遷中常侍爲人清忠奉公靈帝時例封宦者以強爲都鄉侯強辭讓懇惻固不敢當帝乃聽之中平元年黃巾賊起帝問強所宜施行強欲先誅左右貪濁者大赦黨人料簡刺史二千石能否帝納之乃先赦黨人於是諸常侍人人求退又各自徵還宗親子弟在州郡者中常侍趙忠夏惲等遂共搆強兄弟所在並皆貪穢帝不悅使中黃門持兵召強強聞帝召怒曰吾死亂起矣丈夫欲盡忠國家豈能對獄吏乎遂自殺

呂布

按後漢書呂布傳布字奉先五原九原人也以弓馬驍武給并州刺史丁原靈帝崩原受何進召將兵詣洛陽會進敗董卓誘布殺原而并其兵以爲騎都尉誓爲父子稍遷至中郎將嘗小失卓意手戟擲之由是怨卓又與卓傳婢情通益不自安往見司徒王允允使爲內應刺殺卓以爲奮威將軍封溫侯卓將李傕等還攻長安布敗奔袁術復投袁紹已乃歸張楊道經陳留太守張邈相待甚厚陳宮說邈迎布爲兖州牧據濮陽曹操破布於鉅野布東奔劉備時劉備領徐州居下邳與袁術相

拒術欲引布擊備乃與布書令勒兵襲下邳備饑困請降於布布遣屯小沛術懼布爲己害爲子求婚布許之沛相陳珪恐術報布成姻爲難未已於是說布絕婚而就曹操術怒攻布布大破之建安二年布復從袁術操自將擊布殲沂泗以灌城其將侯成率衆降布登白門樓兵圍之急乃下降操縊殺之

呂父

按蜀志呂父傳父字季陽南陽人也父常送故將軍劉焉入蜀值王路隔塞遂不得還父少孤好讀書鼓琴初先主定益州置鹽府校尉較鹽鐵之利後校尉王連請父爲典曹都尉遷新都縣竹令乃心隱恤百姓稱之遷巴西太守徙爲漢中太守累遷廣漢蜀郡太守入爲尚書代董允爲尚書令衆事無留門無停賓父歷職內外治身儉約謙靖少言爲政簡而不煩號爲清能延熙十四年卒子辰景耀中爲成都令辰弟雅謁者

呂凱

按蜀志呂凱傳凱字季平永昌不韋人仕郡五官掾功曹時雍闓等聞先主薨於永安驕黠滋甚降

於吳吳遙署闔爲永昌太守永昌旣在益州郡之西道路壅塞與蜀隔絕而郡太守改易凱與府丞王伉帥厲吏民閉境拒闔凱威恩內著爲郡中所信及丞相亮南征討闔旣發在道而闔已爲高定部曲所殺亮乃以凱爲雲南太守封陽遷亭侯會爲叛夷所害子祥嗣

魏 呂虔

按魏志呂虔傳虔字子恪任城人也太祖在兗州聞虔有膽策以爲從事將家兵守湖陸襄陵校尉杜松部民晁母等作亂太祖以虔代松虔伏兵盡格殺之撫其餘衆羣賊乃平太祖以虔領泰山太守甚有威惠文帝卽王位加裨將軍封益壽亭侯遷徐州刺史請琅邪王祥爲別駕民事一以委之世多其能任賢

呂昭

按世語昭字子展東平人長子異字長悌爲相國掾有寵於司馬文王次子安字仲悌與嵇康善與康俱被誅次子粹字季悌河南尹粹子預字景虞御史中丞

吳 呂範

按吳志呂範傳範字子衡汝南細陽人也避亂壽春孫策見而異之範遂自委策亦親戚待之每與升堂飲宴於太妃前後領宛陵令討破丹陽賊還吳遷都督策薨權復征江夏範與張昭留守後遷平南將軍拜建威將軍封宛陵侯改封南昌侯拜揚州牧性奢靡然勤事奉法故權悅其忠不怪其侈黃武七年遷大司馬卒長子先卒次子據嗣

呂蒙

按吳志呂蒙傳蒙字子明汝南富陂人也少南渡依姊夫鄧當當爲孫策將蒙竊隨當擊賊當顧見大驚呵叱不能禁止時當職吏以蒙年少輕之蒙大怒引刀殺吏出走逃邑子鄭長家出因校尉袁雄自首承間爲言策召見奇之引置左右鄧當死張昭薦蒙代當拜別部司馬權統事拜平北都尉領廣德長又拜偏將軍領尋陽令曹公遣朱光屯皖大開稻田又令閒人招誘鄱陽賊帥使作內應蒙具陳其狀於是權親征皖破之權嘉其功卽拜廬江太守曹公大出濡須權以蒙爲督拒曹公蒙攻破之曹公引退拜蒙左護軍虎威將軍又拜漢昌太守食下雋劉陽漢昌州陵與關羽分土接境知羽驍雄有并兼心且居國上流其勢難久蒙乃密陳計策取羽荊州定以蒙爲南郡太守封孱陵

古今圖書集成
侯會蒙疾發權時在公安迎置內殿卒子霸襲爵與守冢三百家復田五十頃霸卒兄琮襲侯琮卒弟睦嗣

呂岱

按吳志呂岱傳岱字定公廣陵海陵人也爲郡縣吏避亂南渡孫權召署錄事出補餘姚長遷廬陵太守延康元年代步騭爲交州刺史交趾太守士燮卒權以燮子徽領九真太守以校尉陳時代燮徽不承命舉兵戍海口岱潛軍掩之斬徽權嘉其功進拜鎮南將軍黃龍三年以南土清定召岱還屯長沙會武陵蠻蠢動岱與太常潘濬共討定之濬卒岱代濬領荊州與陸遜並在武昌及陸遜卒諸葛恪代遜權乃分武昌爲兩部岱督右部遷上大將軍孫亮卽位拜大司馬岱清身奉公所在可述太平元年卒子凱嗣

呂據

按吳志呂範傳範子據字世議以父任爲郎範卒遷安軍中郎將數討山賊諸深惡劇地所擊皆破拜偏將軍太子卽位拜右將軍明年孫峻殺諸葛恪遷據爲驃騎將軍太平元年帥師侵魏未及淮

聞孫峻死以從弟緄自代據大怒引軍還欲廢緄緄聞之遣從兄慮以都下兵逆據於江都據遂自殺

晉 呂祥

按萬姓統譜祥凱子爲南夷校尉子孫世爲永昌太守李雄破寧州諸呂獨不附舉國固守

呂安

按尙友錄安與嵇康每有相思千里命駕常造康值康不在子喜迎之不入書鳳字于門而去喜以爲善康曰鳳字凡鳥也

呂婆樓

按前秦錄婆樓字廣平略陽氏人也其先呂文和自沛避難徙焉因世居之秦王健以爲散騎常侍後進侍中尙書及生嗣位堅因婆樓以見王猛斬生稱大秦天王以婆樓爲司隸校尉後守太尉卒

呂光

按晉書呂光載記光字世明略陽氏人也其先呂文和漢文帝初自沛避難徙焉世爲會豪父婆樓

佐命苻堅官至太尉光舉賢良除美陽令遷鷹揚將軍從王猛滅慕容暉封都亭侯堅既平山東士馬強盛遂有圖西域之志乃授光使持節都督西討諸軍事光進兵至焉耆其王泥流率其旁國請降又攻龜茲入其城諸國憚光威名貢款屬路東遷涼州刺史梁熙率衆距光光擊敗之聞苻堅爲姚萇所害於是大赦境內自稱涼州牧是時麟見金澤縣百獸從之光以爲己瑞於是僭卽天王位大赦境內改年龍飛立世子紹爲太子以後疾甚立紹爲天王自號太上皇帝以安帝隆安三年死

呂紹

按晉書呂光載記光疾立其太子紹爲天王以呂纂爲太尉呂弘爲司徒光死紹懼爲纂所害以位讓纂纂不許及紹嗣僞位呂超言於紹曰纂統戎積年威震內外恐成大變宜早除之紹不忍弘遣尙書姜紀密告纂纂於是夜率壯士斫洪範門紹自殺

呂纂

按晉書呂光載記光疾立其太子紹爲天王以呂纂爲太尉纂字永緒光之長庶子也苻堅時入太學及堅亂奔姑臧拜武賁中郎將封太原公光死紹嗣僞位纂夜率壯士斫洪範門紹自殺纂遂僭